

摘藻堂四庫全書薈要

集部

欽定四庫全書薈要卷一萬四千一百二十二

集部

騎省集卷二十七

宋 徐鉉 撰

碑銘二首

道碑二首

碣文二首

洪州西山翠巖廣化院故澄源禪師碑銘

聖人設教賢者學之有能極深研幾剖疑析滯不背本
以矯激不汙波而流宕世人宗仰時君褒異斯可以為
君子矣禪師名無殷姓吳氏閩連江人也昔泰伯三讓
肇啟南藩至德所及流光百代子孫蕃衍吳越為多至

今為著姓焉累世隱德鄉曲推重道氣鍾粹而生禪師
幼異常童不染俗態年七歲從晉安雪峰真覺禪師出
家二十詣開元寺受度真覺之道見重於時禪師默識
微言盡得要旨而復博考徃行幽尋勝迹江浙諸郡靡
不經游先達推稱後生請益結轍連袂虛徃實歸禪師
以道貴冲用性復虛靜所止之處學徒俯千人輒復捨
去晚歲止廬陵之禾山其名益彰季唐先主召見之特
加禮遇俾居廣陵之祥光院嗣君踐祚優禮有加賜號

澄源禪師命移處豫章之上藍西山之翠巖院是皆郡
邑之勝概高人之游集自非密行淳德不能鎮服羣情
我迭居之綽有餘裕雖身在巖谷而恩注帷扃存省問
遺使者相望享壽七十有七建隆元年春二月五日終
於翠巖院甘露被樹數日不晞皓鶴盤空三周而去門
弟子用西域之禮葬於院之巽隅封於其上恩旨褒飾
名其丘曰大覺道俗孺慕會其葬者萬數鉉也趣捨異
術聲塵致睽於時釋氏方盛師門互啟嘗侍嗣君宴語

從容上言曰古稱千里一賢猶比肩也今號長者十數無乃多乎嗣君浚以為然因曰惟澄源禪師其殆庶乎無幾何以家門情禮請告至山會師已沒瞻仰遺像參迹行事乃信名不虛得亦表君之知臣今來京都復與師弟子鑒琮相遇琮師志性端慤修習精勤肅奉成規博總衆藝慈惠救物時人稱之明詔賜號慧覺大師錫以紫服朝恩洽於累世實教門之榮觀也於時禪師委順三十年矣琮也思廣銘頌庶永遺風以鉉嘗學舊

史見求直筆若夫褒善稱伐翰墨攸先載瞻西山實寄
松檟敢抽祕思以告九原其銘曰芃芃東越武夷之區
時生異人與古為徒禪師出焉俊邁且都顯顯南楚西
山作鎮真靈所宅教法斯振禪師居之允矣今聞道無
不在法非可名理超言象俗仰風聲豐碑載勒勝氣長
生猗嗟來者用此為程

大宋舒州龍門山乾明禪院碑銘

山岳極天莫雄於瀟霍川瀆紀地莫靈於江淮盤礴縈

帶中列郡國幅員數千里舒皖居其陽真聖之所躔次
景福之所興作必有高士來闡妙門以導精粹之氣以
恢淳和之俗則龍門山乾明禪院所以建也是山東去
郡九十里蓋灊岳之一峯山有龍井郡人雩禱之所靈
應昭哲因以名焉浚巖洞岫風雲之所畜泄湧泉清池
璿碧之所隱見涼颼爽氣五月可以披裘修竹茂林四
時未嘗易葉游方之士至輒忘歸有曉遵禪師者家本
宜春幼捐俗累從師訪道歷抵湘沅探幽洞微得聖人

之宗旨清心鍊行踵前作之風聲向道之徒靡不宗仰
乾德五載始來此山顧瞻林泉有懷棲息邑人宋仁瑗
輟其隴畝以奉宴居面壑臨流誅茅穿徑遠擬關令草
棲之觀近同焦先蝸牛之廬歲計有餘善言來應廬江
人侯霸大施資賄以奉經營數年之間蔚然崇構複
廟重屋瑣窓洞戶藻以丹雘駢以璧璫所以重威神也
黌堂講肄踈楹高坐皓壁月皎層軒霞舒所以敷道義
也前則端闈瞰野旁則修廊納階厨廩充牣屋室安閒

閱經籍於巖房息徒侶於輿寢棟宇延袤凡二百區蓋精誠之所憑實邑里之勝概也今上嗣統像法大興禪師徒步神京對揚雲陛恩旨嘉賞賜號曰乾明禪院華題鳳篆降自慶霄聖日天光煥乎幽谷夫道之行也時與地并斯郡山水竒絕動植茂遂民情淳朴聖迹回環非明主至仁不能恢清淨之教非禪師密行不能化畏壘之民示之以精修祐之以戢穀變魯至道夫何遠哉鉉頃歲謫居此地恩過三載閭里之見待也厚風物之

愜志也深冥得喪之懷無憔悴之色及今三紀未嘗忘
諸會禪師狀肇興之由圖不朽之作受簡秉筆欣然紀
焉銘曰教必有象待時而行道無不在因地而靈潯岳
穹崇皖川清泠鬱鬱佳氣宜為福庭有美遵師為人由
己人應物感風行艮止闢此叢薄化為金地雲構中
開靈光四起君恩啟煥真聖回翔劉雷永遠接軫齊芳
玄符靡測福應無方刊茲樂石用配無疆

大宋故天雄軍節度行軍司馬易府君神道碑

并序

府君諱文贊字廣美豫章高安人也在昔有晉春陵令
雖位不見重忠以亡身祚流子孫繁衍荆楚其世祿種德
則故老家牒詳焉曾祖暇祖崇皆不仕妣鄒氏追封范
陽縣太君從子貴也君符彩爽邁質性深沉少遭時有
吳功臣劉公信節制豫章訓兵選士聞君名而召之君
謂所親曰大丈夫當立功立事以大家門吾聞劉公剛
毅倜儻有英雄之量必能申吾用也乃杖策從之甚見

器重委以禦侮授之親兵出為爪牙入參侍直外捍封
略中清寇攘十年之間遂升右職劉公物故唐室中興
君於是策名周行入典離衛於時戎事甫定國家載穆
君止於拊循士衆恭守官常時其寒燠均其勞逸勤毖
徼道廉察呵留不矜出位之思甚得為將之體自皇威
軍裨將累遷至左右天威軍都虞候自檢校右常侍至
檢校太保及淮甸倣擾都邑震驚以君為雄州刺史充
建武軍使其理所即廣陵之天長縣也據衝要之地有

士民之衆綏懷訓練其俗用和會周世宗親搃六師志平江右於是濠泗攜叛揚楚摧陷君城小援絕堅守累旬世宗使降將郭廷謂臨城招諭君曰棄命以苟生不義勦民以全名不仁吾處中道而已乃間道表於本朝備陳形勢且論遠慮還旨嘉納諭以割地之謀君即開城請罪世宗慰勞數四錫賚加等即授衡州刺史封太原縣子充天雄軍節度行軍司馬皇宋啟運優獎有加改道州刺史進爵為侯君以俯絳老之年有郤克之疾

表求致仕優詔不許勤懇固請聽歸臨淮郡私第春秋七十有五開寶元年秋七月考終命三年九月葬於盱眙縣義和鄉西嵩里北團山禮也夫人會稽縣君謝氏亦江左之冠族作合君子克昭令儀箴管之勤夙彰於婦德湯沐之邑晚從於夫貴訓導諸子備全義方鍾蓬首之痛哀而知禮受高堂之養嚴而有慈春秋七十有六太平興國二年七月終於臨淮私第某年月日合祔焉禮也有子五人曰延貴延祚延壽延義並克荷先業

勤修令名或參藩郡或幹內職皆先夫人而沒唯第四子延慶獨稟粹和服膺儒教孝悌之至稱於州閭承顏先意侔曾閔之行居喪過哀有二連之風廬墓絕漿義感生植嘉木連理玉芝成葉遠近聞之莫不驚嘆由是自前臨淮令拜大理丞及夫人卜塋違制臨赴為有司所劾有詔勿問聽解秩家居惟府君之生也臨戎以恩信理民以慈惠事君全其節處身由其道故垂此家法推為慶門是生孝子以永世紀美矣哉鉉聞風而悅之

故勒於神道其辭曰於惟易氏忠義之門德厚流光顯
於後昆後昆之賢生我府君體道自居壯圖不羣輟耕
永歎負羽從軍赳赳和門勇節斯設靜則嚴重動則奮
發臨難忘私處危全節名遂身泰考終無闕芄芄泗州
永閔佳城哀哀孝子載感坤靈君恩賁寵樂石刊銘百
代之下常流淑聲

故唐大理司直鄂州漢陽令贈衛尉少卿樊君

神道碑

公諱潛字仲明京兆萬年人也昔者虞仲垂孫謀之慶
肇啟我封山甫昭補職之勤實大吾族或則游聖門而
稱達者或則冠先籍而號真人豐沛功臣經營於大業
南陽外戚佐佑於中興傳祀百世流光萬國而我之占
籍世茂西京樊川之居抗衡韋杜曾祖澄以七世同爨
孝德升聞大中制恩特加旌表峩峩石闕至今存焉祖
偁濮州司戶叅軍考諭光化中補池州至德令時天下
已亂因家池陽終潤州金壇令公中和稟粹形器夙成

好學之勤本由天賦至孝之性不墜家聲始及弱冠併
違怙恃絕漿泣血哀感州閭負土成墳終喪廬墓言子
道者以為美談於時唐祚淪胥宗室稱制江淮之地不
失舊章公以射策高等補潤州丹陽尉試吏之課書考
為優廬陵之民古稱多訟加以畝藉違制亂獄滋豐守
臣上言求拯其弊有命擇堪其事者聞公之能因而命
之公既至乃相五土之沃瘠察人家之衆寡采古之制
酌今之宜創為新規衆皆悅服而復出械繫之老窮兩

造之辭雪當死者數十人使還議賞增秩進等遷壽州
壽春縣主簿既而廬陵之政日理南楚之人聳觀久之
以公為光州光山縣令加大理評事猶以前效也於時南
北分裂縣臨敵境有爭桑之女多探丸之吏比閭之衆
罕嘗寧居公於是糾集義勇分守要害推以恩信濟之
強明三載之中一邑用乂遷池州石埭令縣有大姓侵
撓細民歲比不登俗乃重困公繩之以法董之以威豪
右震悚相與逃匿於是啟請出官粟以賑乏絕省力役

以濟農功慈撫仁薰視之如子歲豐俗阜政用大成就
加大理司直旌能政也秩滿遷鄂州漢陽令未幾遇疾
壬子歲某月日終於縣之正寢享年五十有七以丙辰
歲某月日葬於池州貴池縣永泰鄉保靜里之原禮也
夫人王氏鴻臚卿滔之女軒冕之族閨房之秀室家垂
訓惠問風行長子若訥不事王侯自全高尚次子知古
才藝畢給際會昌朝踐歷臺省交修繁劇今為右諫議
大夫河北轉運使揚名之業方茂顯親之數遂優公累

贈秘書丞戶部員外郎衛尉少卿夫人封瑯琊縣太君
惟公生而岐嶷長而學問窮九經之奧旨綜百氏之微
言率是古道施於為政行之以直守之以廉事親以孝
飭躬以禮士元之器命屈於生前臧孫之忠慶貽於身
後君恩飾壤世祿傳家咸京之舊表未堙秋浦之豐碑
復立俗有遺愛吾無愧辭其銘曰南山崇崇樊川溶溶
翦商之烈補衮之功百代之後流光不窮爰有孝德克
生我公猗歟我公顯允君子投此利刃行於百里有惠

於民何必貴仕垂慶於後何必在已慶霄之澤自葉流
根歿乘中佃生駕魚軒二子殊志俱大在門佼佼愚谷
英英諫垣九峯之下貴池之口覆斧馬鬣金雞玉狗民
即桐鄉碑如峴首江水長流令名同久

洪州豐城縣李司空廟碑文

先王之制以勞定國以死勤事皆得祀之然則非適幽
洞靈之士有驚愚顯俗之迹亦不能臻此也李君諱承
勳字大用其先隴西人中葉因官遂家上黨先君諱神

福避亂擇主來適維揚於時唐室崩離諸侯角逐吳武
王奮桓文之舉我先君效闕張之用推兗略地所向無
前功加於時慶鍾於後終淮南節度副使鄂州招討使
君即招討長子也幼而爽俊長而雄勇年始志學即從
義旗善撫士卒生知韜略厲若鷹隼疾如風電時稱虎
子敵畏馬兒以功累檢校左右僕射為橫衝裨將天祐
丙寅歲從招討使奉命平豫章叙功為最新附之地屬
郡未賓明年命君領偏師平餘盜戈船先進羣帥後期山

越霧集漢矢且盡同玄冥之沒若祭公之沉享年二十
有三諸將嗣事逋穢克清迎君之喪窆於洪州豐城縣
揚子洲惟君夙齡挺秀盡忠死節識與不識雜然推奇
而英靈矜嚮若在左右如鄭人之驚伯有類吳俗之畏
子文於是耆艾相率啟求立祠於墓側公議僉允因贈
司空水旱禱祈無不即應鄉邑之際頻歲豐穰湍瀨無
虞疾厲不作而君之家門亦康寧蕃衍焉及今七十年
矣雖神道恍惚不可脩論而忠誠報應良足為勸猶恐

年世綿邈流俗失傳或見孫於越巫將受譏於淫祀嫡
孫仁昭願以事實勒於貞珉鉉素與君諸子游復連姻
戚披文相質所不獲辭初君之長弟諱承鼎為吳王之
愛壻故國人咸謂君為伯氏而忘其官稱焉今用明白
之銘曰嗚呼李君勇且有仁生殉國難沒為明神南楚
之郊章江之濱祠堂奕奕像設僣僣薦信以時降祐於
民龍泉太阿校靈比珍衝斗之氣終天不淪

洪州道正倪君碣

君諱少通字子明其先千乘人也末葉避地徙居巴陵
灌洞庭之餘波襲九嶷之秀氣儒風繼世貞節自持垂
慶炳靈仙才是出君風骨秀整襟懷坦夷幼挺高情卽
依道槌弱冠遐舉來游九江悅廬阜之名區得董君之
故蹟種杏之地榛莽森如慨然永懷誓復靈構誅茅
築室練行修身閤然而彰千里斯應於時唐運告謝宋
室代興江左被玄元之風二葉恢清淨之教君以清心
苦節升聞於朝癸丑歲賜錢三百萬卽所居建太一之

觀於是䟽鑿舊址草創新規悅以予來成之勿亟十有
餘歲清宮煥然凡建四殿五堂重門兩序內外棟宇總
百三十區像設儀衛莫不稱是力闢汙萊為良田者五
百畝而飲賢之費有餘手植杉松成茂林者千餘根而
甘露之祥再降由是牧守嘉尚道俗依憑為本州道正
乃知太乙觀事享壽九十有一體力康壯淳化元年秋
八月八日子時怡然而化容貌如生初君自擇塋地於
蓮花峰下即以二年春正月窆焉君性質冲淡不耀其

光表率教門正身而已喜賦詠善鼓琴龍鳳之形皆由
手製山水之操自洽天和所居之觀俯邇城郭登山之
客必先造焉君將迎接待高卑如一絕迹市朝成樂林
泉六十餘年慎終如始門人弟子先以慈孝為訓有若
李延照蔣守龍等近四十餘人皆以孝行為時所稱親
弟德規同學弟謝又能等叶力同心共復靈跡並先早
世今謝君弟子王省昂嗣膺道任師孫錢知素繼知太
乙觀事師門之盛論者美之鉉頃歲扈從南巡與師款

接旬日傾盖之分有如素交錢君以論譔見求不當為
讓其銘曰太乙董君上帝之賓遺方眇邈舊迹荆榛倪
師慷慨復來清塵種杏之地林光再新異世神交豈其
後身冥升自遠化劍非淪瞻言華表誰見千春刊盟翠
琰道契攸親

騎省集卷二十七

謹案卷二十五第四頁前四行播樂石於無窮原
本樂訛藥今改

第五頁後三行史過之論至哉原本過訛遇據左
傳改

第九頁後六行刻犀息沴原本刻訛到沴訛珍據
水經注改

第十一頁前五行示庶民之光聖慮極冰霜之誠
按此二句中有脫誤

卷二十六第五頁前一行若奉武夷之會原本夷訛吏據真誥改


第八頁前七行既表大庭之庫原本庫訛車據左傳改

第九頁前四行建華清之宮原本華清訛清華據新唐書改

卷二十七第五頁前五行闕此叢薄原本叢訛崇今改

第十四頁後四行化劍非淪原本化訛代據豫章
記改





總校官庶吉士臣張能照

校對官學正臣李巖

謄錄監生臣李如梓

欽定四庫全書薈要

集部

騎省集卷二十八至三十

詳校官助教臣常循



欽定四庫全書薈要卷一萬四千一百二十三

集部

騎省集卷二十八

宋 徐鉉 撰

記十首

泗州重修文宣王廟記



昔我先聖有周公之才無文王之時故憲章其道以垂萬世精神冥契夕則夢之是知千載旦暮蓋其道同也自時以降鴻儒碩生敷暢微言佐佑大化專一之志通於神明感夢宣尼以著名實斯文間作來者不誣國家

彰灼神功在宥天下禮樂刑政舉百王之中典謨訓誥
用三代之式文學之士靡然向風臨淮徐君名某字某
弱而好學壯而有立行敦乎族黨名聞於州閭修辭立
誠躬儒者之業博施濟衆秉義士之規隨計春官再不
中選會長子宗孟郡亦舉秀才君以為名不可多取即
欲退而求志無何夢游淮上倏有淪胥之厄衆君子拯
之而置於宣聖之堂儼然逢掖之容若奉緇帷之會悟
而神聳益用兢懷聞者竒之勉以西上明年春冕旒臨

御親較羣才崇朝之間父子俱捷蓋古今未之有也君
歎曰天子廣孤平之路杜請謁之門先聖知之是有敦
勉斯實至德感兆鄙何有焉思欲昭答靈心正顯玄貺
惟茲泗上雄視百城學校之制義在不後王業伊始天
下初平舟車輻輳之都郵傳旁午之地邦君丞掾日不
暇給絃誦之所窺戶闐然君白於府君願補闕政於是
出家積鳩國工即舊謀新瞻星揆日乃建路寢乃立應
門闡講論之堂設東西之序廣袤合度奢儉中規像設

增嚴繪素加煥凡祭器制度皆圖於垣墉俾夫觀藝之徒橫經之侶居今識古虛往實歸三代之風由斯而致也錄事參軍張君濬網紀之任夙夜惟寅嘗與同僚及斯而歎曰振舉廢闕公力未遑倘屬於好事君子非徐公不能也及茲締構如宿契焉是知善人之言罔弗響答夫聖人之教也與天地常在將陰陽並運恍惚玄應昧者不知今徐君服之而成大名感之而臻介福咨爾後學可不勉歟金石之銘其無愧已於時歲次乙酉

雍熙二年秋七月記

邢州紫極宮老君殿記

昔者老君伯陽憫大道之既隱傷周室之既微以為清
淨無為道之本也非建言不能盡其意安上治民道之
用也非設教不能永其成乃著書於函闕以明清心之
要授禮於仲尼以開垂世之統由是教義之被於民如
造化之漸於物賢者識其大不賢者識其小出入戰國
經歷薄俗君君臣臣父子子民到於今受其賜則二

聖人是賴焉故並享明祀格於寓縣雖百世不能易也
邢州紫極宮者唐開元中所立老君像則琢玉石以為
之真靈所憑功用殊絕睟容竒表儼然若存瞻仰之徒
莫不增肅王室剝亂郡國崩離三晉之郊戎馬孔棘崇
堂墮落乃移像於北極殿之西偏數十年之間不絕如
綫皇宋膺運百度惟貞道風載揚真侶咸萃女道士陳
休元江左右族夙握玄符不隨象服之華自結鳳羅之
誓勤行匪懈真氣日滋乙亥歲伯氏從宦將之俱至畏

壘知化汗漫與期郡守賢之授以宮任亦既蒞止慨然
永懷嗟崇構之傾頽歎尊位之糅雜程工度費即舊
謀新知州事段公思恭仙派真源諫垣舊德嘉其偉志
助以俸金郡僚而下歡然風靡即宮之西序建老君殿
三間材用必良工藝必精廣袤中規奢儉合度旭景升
而丹彩煥清風襲而爽氣生肅然仙都復覩靈境粵某
年月奉玉像而處焉霓衣致虔羽蓋成列几筵嚴肅香
燭必芬鐘磬咸和煙雲改色非至誠感召孰能臻此者

乎鍊師之家奕葉從公清白垂訓仲兄前鹿邑令省躬秉直忤俗退而貞居季兄邢州書記長參學古入官和以接物積善之報宜生仙才鉉知二君歲久故美其事而紀於石某年十二月二日記

洪州華山胡氏書堂記

士君子承積善之慶服聖人之道治身修心義之本也風行於家德之充也教被於俗人之周也疇克具舉吾其與之豫章屬邑椒丘舊里山水特秀英靈所躋安定

胡君實籍於是君名仲充字光輔奕葉儒學蟬聯簪紱曾
門標舉煥列宿之華祖德韜映戢少微之耀至於我先
人少好左氏春秋之學研幾索隱儒者宗焉及君之長
克揚其業言斯出矣身則踐之揖讓周旋之儀孝友姻
睦之行修乎閨門之內形於羣從之間少長有禮總麻
同爨鄉黨率義人無間然君以為上古之風可以馴致
由六經之旨可以化成也乃即別墅華林山陽玄秀峰
下構書堂焉築室百區聚書五千卷子弟及遠方之

士從學者數千人歲時討論講席無絕又以為學者常存神閒曠之地游目清虛之境然後粹和內充道德來應於是列植松竹間以葩華涌泉清池環流於其間虛亭菌閣鼎峙於其上處者無斃游者忘歸蘭亭石室不能加也又案圖牒云昔陶立公李八百皆修道於此是知人境相得其道乃光勤而行之古猶今也鉉欽羨其事道阻且躋故述斯文以垂不朽年月日記

洪州新建尚書白公祠堂記

大丈夫處厚居實據德依仁豈徒潔身將以濟世故著
於事業發於文詞而後功績宣焉聲名立焉盖有其實
者必有其名是以君子耻沒世而名不聞也若乃格於
穹壤漸於蠻夷大則藏於金匱石室之書細則誦於婦
女稚孺之口則古今已來彰灼悠久未有如白樂天者
不其異乎故神明相之攸居不傾黎甿懷之餘風不泯
士大夫神交道親若旦暮焉尋陽古郡昔君謫宦之所
綿祀二百市朝屢變而司馬聽事之室巋然獨存斯益

異矣聖運光啟崇古尚文三代之風傳遠萬里禮部郎

中江南轉運使張去華述職按部聿來是邦弭節城闔
攝齊堂奧以為先賢所舍邑里具瞻與夫元規之樓惠
遠之社崇飾祇薦我何後焉太子中允知州事梁君翊
贊善大夫通判州事羅君或皆叶規同心相視莫逆政
有餘裕府多羨財即舊謀新創為祠宇傳寫廬山之遺
像寘於北墉棟宇深嚴門序奧祕肅然廟貌想見其人
凡游居之徒仰高山聆遺韻薦誠觀藝結轍於斯禮不

云乎禱祀古之卿士有益於人者觀樂天之文主諷刺
垂教化窮理本達物情後之學者服膺研精則去聖何
遠其為益也不亦多乎尸而祝之固其宜矣某昔游廬
岳獲拜儀形今塵騎省遙聞締構喜儒宗之不墜嘉
使者之得人故作斯文勒於貞石年月日記

洪州始豐山興玄觀記

聖人之言道無不在若乃域中歸其大萬物待之生鴻
化玄造無德而稱已至於顯神道之教挺方外之衛反

之於身以固其本清心鍊氣保精啻神飡霞茹芝修用者殊軌御風乘景游集者無方蓋真階仙品之有差故洞天福地而區別奇篇所紀靈境可尋豫章始豐山者案圖牒第三十七之福地也爾其穹窿蹇蹇干霄蔽日凌空瞰野之勢嶽峯窈窕蒸雲泄雨儲神宅怪之奇陰林修幹材用之所生也周飛湍激流利澤之所及者遠紫烟白霧隱映而紛霏靈風爽氣蕭寥而披靡醺享之數歷代相因爰有興玄之觀是為薦誠之地土德云季

三災迭興市朝貿遷堂構隳頓幾歎遼城之鶴常栖
楚幕之烏若夫真氣所憑神靈攸相物無終否道不遠
人道士聶紫庭襲玉筍之地英追九仙之夙契以勤行
為志業以倣古為師資歲在玄枵來游此觀顧瞻祠宇
慷慨傷懷徒侶敦請遂膺其任積行所應至誠易通游
居之人莫不信奉以為興作者古人之所慎因仍者前
哲之所宗足備制度何必侈大於是補其闕而葺其壞
窒其隙而扶其傾集瓴甌搏埴之工加巧塤丹雘之飾

瑣窓鏤檻朱戶金鋪沈深靡迤虛明藻麗百年舊制一
旦維新日就厥功十稔而已已不病於費人不知其勞
用此修真真其焉往又以方志漏略碑頌湮沉使夫來
者何所宗仰謂余為好道者故求我以文是用直書以
觀成績淳化元年夏六月記

金陵寂樂塔院故玄寂禪師影堂記

士有切問強記以修其內和光退節以晦其外而人自
仰之名自歸之不知所以然而然見之於玄寂禪師矣

師名澄紀姓陳氏番禺人既生而孤天骨奇秀岐嶷之態有異常童端居靜念如學道者七歲復失所恃母臨終以紀其始曰此兒幼有奇應法當出家倘果斯願吾無恨矣年十一歲遂詣本郡從師十七歲韶州南華寺正度於是造詣先達請益質疑歷游名山無遠弗届不違類於顏子起予同於卜商丁未歲來止舒州山谷寺徧閱經論師門之學無所不通然未嘗為人言也是時季唐二葉像法大興凡聚徒講學者所在奉之以為長

老禪師狗狎鷗之志慕爭席之風雖衆人與居而羣望
自集道俗敦請抗志不從郡守周公因人之心封章上
啟嗣君嘉賞以詔書命之周公延至郡齋親為致禮師
不得已乃躡齋即坐音詞高朗寮吏屬目士庶咸歡還
處精廬宴居如故丁巳歲避難南渡止於廬山嗣君召
致建康累徵乃至遍處名寺咸敷講席恩禮優渥賜號
玄寂禪師時之名流無不景仰至於誘進後學開導真
詮激厲憤悱皆得所欲乾德五年冬十一月終於建康

龍光禪院春秋六十有一後主遣中使護塋贈送甚優
葬於都城東南隅鳳臺鄉門人弟子廬於墓次誅茅構
宇遂成道場儼然靈儀式觀遺愛鉉頃自禁掖放逐
舒庸閑闕却掃不與人事時游瀟岳因獲覲止容貌
閒暇議論平淡言意相得有若舊交雖慙方外之期自
叶忘形之契一生一死已隔於當年谷變陸遷復悲於
陳迹弟子嗣昭等永懷遺範願勒貞珉因述斯文庶申
夙分某年月日記

撫州永安禪院記

教之大者其行達利之博者其報豐自三代已還百家
並騖炎靈之後釋氏特隆經法之盛參乎先聖祠宇之
設廣於虞庠不知所以然而然非言像所及已撫州郡
署之左里而近有禪院焉乾符中署曰寶國天祐中改
名永安方志失傳莫知肇興之始高人迭處咸為宴坐
之場夫經像之所居苾薺之所薦必將據郡國之形勝
襲川原之氣象斯郡也摠楚越之都會斯院也浸章汝

之清流逸少康樂江左名士而墨池經臺介乎比閭麻姑南真丹臺上列而僊壇閒館峙乎封域閑閤相望鐘磬交音神靈之所依憑烟霞之所韜映爾其棟宇之狀也則赫赫乎顯敞眈眈乎深嚴黼藻成文磨礱盡妙層樓對峙修廊四通列講肆於崇堂安衆士於奧室動有擊蒙之益靜有寧體之娛儲峙必豐器用必給四方學者至輒如歸考績程功則住持禪師義韜之力也韜公道學精詣慧心明悟以濟衆為務以興教為懷少游名

都歷訪先達晚棲臨汝自闢師門甲申歲詣京華褐衣
請見對揚玉宸躬奉天言論難所及辭義響答聖恩加
矚賜以紫衣登門之徒莫不增肅韜公以斯院制度崇
麗修奉精嚴金石闕如何以示後惠然見顧求我以文
辭讓不獲因為之記年月日記

潤州甘露寺新建舍利塔記

維皇宋二葉改元五祀潤州丹徒縣令王君改築縣牆
掘地得石函驗其刻文梁大同五年道人法序瘞真身

舍利於此。函中銅龕一龕，中銀盒一盒，中銀瓶二，舍利七粒存焉。而銅龕復有刻文，則唐貞觀十二年再加營奉掌役者張遇，獲之以獻。遇也，感真應之在已，念妙道之可修，因投郡之慈雲寺，削髮為沙門，易名圭，精心苦行，誓復前迹。廣募衆施，疇咨協心。數年之間，克果其願。即以端拱元年夏四月八日遷，致於郡之甘露寺東隅。建浮屠焉，獻狀而來，求志其蹟。粵聖人在上，欽若靈心，政無不修，神靡不舉。玄貺交感，坤元效珍，用能使幽痊。

之質煥然景彰騫崩之迹蔚然崇構然則澤及微隱
福被含生其可知也是郡也揚州之都會京口之重鎮
六代之風流人物綜萃於斯三吳之山川林泉肇發於
此高深自改氣象常存是寺也北固山之陰崖贊皇公
之遺迹崢嶸飛閣迴闕滄江邇邇巖房周行數里構締伊
始遠邇雲臻故真師因人之心相地之勝獲此空隙建
茲崇封材用工役必求善良規模制度必據經法其高
七十尺其周二十步八隅瑩玉五蓋凌霄冠星珠於觚稜

積日先照圖雲氣於焚燎宿霧常棲中嚴睟容肅然月
滿旁績靈變煥若霞舒游居之徒莫不稱歎愚嘗見釋
氏子為此役者多矣如真師者其涉道也深其居處也
卑上無許史之託下無猗陶之助苦節以感物積微而
著功不愆民不愆素而能事以立亦可尚也故嘉而志
之端拱二年二月一日記

重建宓子賤碑陰記

單父縣宓子賤舊碑賈至文梁耿書天寶十年四月四

日柳載建始致於故縣北隅琴堂之上光化二年以縣
為郡署縣令李君移縣理於今所碑亦隨徙措置不謹
風雨所摧因折為數段扶置垣牆之間及今八十年矣
皇宋撫運書軌大同人文化成清和咸理縣令毛君名
庶幾越自江左來撫斯民見賢思齊好古博雅以為宓
子之化人猶不忘賈公之文世共稱賞若棄之不修非
所以訓民事神也於是再建隆碣重書舊詞以鉉嘗學
篆籀見求運筆梁氏之迹本自非工仍為倒薤之勢非

八書之正也而又字體譌俗文詞舛誤今以賈氏集校而正之遠擬秦李斯改為玉筋立於宓君之祠庭事之宜也以改作之意附於碑陰云太平興國五年正月二十日記

邠州定平縣傳燈禪院記

乾維巨屏實曰邠郊其地險固其氣剛健被宗周信厚之澤識王業艱難之風是故人知徼福之方俗嚴慈氏之教精廬靜宇隱鱗相望定平縣傳燈禪院者帶位署

之左方據郭邑之勝勢高墪環其趾涇水盪其胸却倚
崇岡爰標龍尾之號上瀉寒澗仍有天河之稱藹爾鮮
原鬱然佳氣昔在唐室之季四海崩離中和四年有禪
師從一者挺秀宗門從師臨海避難高舉擇地遐征萬
里而來稅駕於此相其爽塏有志盤桓羣心翕然助成
其事買地築室者咸集橫經躡屨者亦臻十年之間百
堵斯建守官嘉尚請命於朝景福二年詔賜題署天光
所及道譽彌高一公化去弟子佐範克嗣其業範之弟

子知信復繼其任守之以恪加之以勤感召益多法事
增廣殿堂像設靡不莊嚴儲侍器用無乏供億而經典
猶闕講誦弗聞以為居今識古者存乎書觀象得意者
存乎言金匱石室之宏規名山京師之故事此而不務
何以為能乾德四年秋肇啟精誠指期繕寫邑人石遷
等聞風而悅叶比其謀日就月將惟力是視卷以緗帙
貯之琅函邑人高玘奉其家山以備構室采伐之備
夫役未充俄而暴雨猥至山溜奔激屹然巨石自至院

前取以給用宛契心匠雖廬岳神道之殿石頭後渚之
梁感通真符無以過也既而信公復沒以屬弟子令熙
熙也遵行弗敢失墜而民非兆萬俗空猗陶漸以化之
靜以俟之二十許年猶未訖事會中使王君名素分權
筦之職督闕梁之征歸餘於終率籲衆力於是簡牘几
閣即日僱工俾下帷鑿壁者得肆其勤研精索隱者不
愆其義貞風無泯介福來臻繫高士四世之勤垂本宗
百代之憲宜其篆刻金石永示方來知余有好善之心

專舊史之學求我以文是用直書於時歲次壬辰淳化
三年春三月記

騎省集卷二十八

欽定四庫全書薈要卷一萬四千一百二十四

集部

騎省集卷二十九

宋 徐鉉 撰

誌銘六首

大宋左千牛衛上將軍追封吳王隴西公墓誌

銘

盛德百世善繼者所以主其祀聖人無外善守者不能
固其存蓋運歷之所推亦古今之一貫其有享蕃錫之
寵保克終之美殊恩飾壤懿範流光傳之金石斯不誣

矣王諱煜字重光隴西人也昔庭堅贊九德伯陽恢至
道皇天眷祐錫祚於唐祖宗神武世有顯德載祀三百龜
玉淪胥宗子維城蕃衍萬國江淮之地獨奉長安故我
顯祖用膺推戴淳耀之烈載光舊美二世承基克廣其
業皇宋將啟玄貺冥待有周開先太祖歷試威德所及
寧宇將同故我舊邦祇畏天命貶大號以稟朔獻地圖
以請吏故得義動元后風行域中恩禮有加綏懷不世
魯用天王之禮自越常鈞鄴存紀侯之國曾何足貴王

以世嫡嗣服以古道馭民欽若彛倫率循先志奉烝嘗
恭色養必以孝賓大臣事耆老必以禮居處服御必以
節言動施舍必以時至於荷全濟之功謹藩國之度勤
修九貢府無虛月祇奉百役知無不為十五年間天眷
彌渥然而果於自信怠於周防西鄰起釁南箕構禍
投杼致慈親之惑乞火無里婦之辭始勞因壘之師終
後塗山之會太祖至仁之舉大賚為懷錄勤王之前效
恢焚諂之廣度位以上將爵為通侯待遇如初寵錫斯

厚今上宣猷大麓敷惠萬方每侍論思常存開釋及飛
天在運麗澤推恩進擢上公之封仍加掌武之秩侍從
親禮勉諭優容方將度越等夷登崇名數嗚呼閱川無
捨景命不融太平興國三年秋七月八日遘疾薨於
京師之里第享年四十有二皇上撫几興悼投瓜軫悲
痛生之不逮俾歿而加飭特詔輟朝三日贈太師追封
吳王命中使蒞葬凡喪祭所須皆從官給即其年冬十
月日葬於河南府某縣某鄉某里禮也夫人鄭國夫人

周氏勲舊之族是生邦媛肅雍之美流詠國風才實女

師言成閫則子左千牛大將軍某襟神俊茂識度淹通
孝悌自表於天資才略靡由於師訓日出之學未易可
量惟王天骨秀異神氣清精言動有則容止可觀精究
六經旁綜百氏常以周孔之道不可暫離經國化民發
號施令造次於是始終不渝酷好文辭多所述作一游
一豫將以儒風載笑載言不忘經義洞曉音律精別雅
鄭窮先王制作之意審風俗淳薄之原為文論之以續

樂記所著文集三十卷雜說百篇味其文知其道矣於
弧矢之善筆札之工天縱多能必造精絕本以惻隱之
性仍好竺乾之教草木不殺禽魚咸遂賞人之善常若
不及掩人之過惟恐其聞以至法不勝姦威不克愛以
厭兵之俗當用武之世孔明罕應變之略不成近功偃
王躬仁義之行終於亡國道有所在復何媿歟嗚呼哀
哉二室南峙三川東注瞻上陽之宮闕望北邙之靈樹
旁寂寂兮迥野下冥冥兮長暮寄不朽於金石庶有傳

於竹素其銘曰天鑒九德錫我唐祚綿綿瓜瓞茫茫商
土裔孫有慶萬物重覩開國承疆距吳跨楚喪亂孔棘我
恤疇依聖人既作我知所歸終日靡俟先天不違惟藩
惟輔永言固之道或汙隆時有險易蠅止於棘虎游於
市明明大君寬仁以濟嘉爾前哲釋茲後至亦覩亦
見乃侯乃公沐浴玄澤徊翔景風如松之茂如山之崇
奈何不淑運極化窮舊國䟽封新阡啟室人諗之謀卜
云其吉龍章驥德蘭言玉質邈爾何往此焉終畢儼青

盖兮排排驅素虬兮遲遲即隧路兮徒返望君門兮永
辭庶九原之可作與緱嶺兮相期垂斯文於億載將樂
石兮無虧

大宋右千牛衛上將軍隴西郡公李公墓誌銘

公諱從善字子師隴西成紀人唐室之諸孫元和之近
屬譜牒詳悉此不具陳若夫天祚之德大運有時而極
積慶之祀百世無得而踈必生克肖之賢以承有後之
應保姓受氏公實宜之昔者土德既微羣雄角立維我

顯祖奄宅舊吳延祚四紀傳國三世公以天屬之愛膺
寶玉之封始在膠庠已有名望姿儀秀出文學生知仁
孝極於事君謙抑形於下士中外之論翕然稱之由是
受任六官交修庶職彌綸舊典諮訪老成恪居無違所
至皆理於時聖人出於中土正朔及於四方維我先君
祇畏天命受盟請吏息民弭兵玉帛交馳冠蓋相望公
親則介弟位則中台獨奉絲綸留叅槐棘元戎四牡分
建節之權立冕九章奉侍祠之列朝獎既厚臣誠益恭

後凋之葉無渝萬頃之陂自若故得全名節於危疑之際保恩顧於終始之間環衛迭遷寄仕增重盤根必解師律以貞十有餘年其志如一嗚呼修塗方騁景命不融春秋四十有八雍熙四年九月九日薨於通許護軍之廨詔輟朝一日賻絹百匹即其年冬十月十三日塋於開封府開封縣吹臺鄉蘓里祔太夫人凌氏之塋禮也前夫人徐氏繼室周氏並早卒皆有肅雍之德窈窕之華宜家治內盡其規魚軒象服昭其盛子十四人仲

顗仲翔仲衍仲華仲雅仲隸仲寧仲簡仲彬仲文仲猷
仲玄仲義仲端女十四人慕英懿卿奉蘋蘊簡正容茂
節穉仙惠昭如賓道崇鳳兆幼貞閨秀季真或嬪於盛
族或待禮未行惟公生於深宮特稟異氣謙而得禮和
而執中容納直言賓延素士經歷夷險雅度不渝大年
永登終古同難鉉登門斯久辱顧殊深永惟知己之恩
願表為陵之谷其銘曰貞源引派仙李垂芳實生我公
金玉其相非禮勿動出言有章忠信以濟終然允臧三

代之姓倏焉為庶九萬之程溘然中路吹臺北峙浚川
東注不植刺草長瞻宰樹大雅君子隴西公墓

大宋故處士贈太子少師李公墓誌銘

并序

道之泰也賢人振衣而濟物時之否也君子括囊以獨
善其有修之家而孚感於俗無其位而博施於人角立
傑出蓋亦難矣公諱某字某庭堅邁德百世流光源長
派遠蕃衍郡國今為常山真定人也祖某贈太子少保
考某贈太子少傅公即少傅第三子也幼而岐嶷長而

純孝承顏先意實稟生知七歲丁太夫人之憂泣血絕
漿殆於毀滅宗族驚異謂之神童事兄弟人莫能間先
是唐之叔世燕趙多虞故我先人累世貞遯公亦奉家
法咸樂丘園躬稼敦本儉以足用百年之業是享素封
既而天下兵興生民益否公盡出私積以均有無為食以
救飢歎微嗟來之誚焚券以贈乏絕非市義之求遠邇
之人全濟甚衆懷仁向義者撫之既無矜色背惠棄信
者接之亦無愠容襟懷曠然莫窺其際慈愛惻隱視人

如傷昆蟲草木無所天閼故閭里率化風俗以和崇儒
遵道墳籍未嘗釋手喜酒好客醒醉必與之同常以為
芳華易凋光陰不駐發於吟咏以寄其情藜杖角巾所
至皆適是非擾擾若蚊蚋之過前愚智憧憧若蜾蠃之
在側至矣哉古之達者也開運末有晉失御獫狁孔棘
公挈家南度居於昨城伯氏飛龍府君時在滎陽召公
同處廣順三年夏六月日終於鄭州私第享年四十有
三夫人清河郡太夫人張氏以謝女之淑德徇萊妻之

高節宜家理內令問藹然姑性最嚴諸婦皆聳夫人順
而得禮勤而無怨晨夕忝侍獨被深慈凡飲食藥餌須
經夫人之手然後即御長姒亦頗嚴厲夫人事之如姑
或被誚責怡聲致拜由是閨門之內不肅而成及罹共
姜之哀更全孟母之訓諸孤稍長教以學文為之擇師
友為之致經籍凡學舍賓館之所須者輟衣食捐簪珥
以奉躬截髮之惠俾其親仁引斷織之言誠其中廢故
諸子皆立門戶如初越建隆二年秋七月十日終於鄭

州私第享年四十有五長子格大理寺評事次子至吏部侍郎兼祕書監吏部以文學冠時擢高第於聖鑒以才業膺世叅大政於中區以疾告罷復為少宰天子秘書於中禁命我專掌式恢文教時人榮之先是少師之塋也世猶多故禮或有闕及夫人祔也塋地逼隘介於羣冢之間君子曰非安神之宅也即以端拱元年冬十二月十三日改卜於鄭州管城縣某鄉里原禮也鉉鄉里遼負聲慶致睽竭來京師獲與吏部游處覩于公高

門之盛知臧孫有後之由公之行實皆聞於輿論或得
於家老梗概而已不能備舉也金石之紀宜在鴻儒惠
然見顧辭不獲命謹為銘曰天生賢人以佑民生生民
數竒賢人隱淪修之於家富以其隣里閭率化宗族歸
仁樂天知命全和保真鳳皇於飛以況嘉耦伯鸞之妻
士行之母婉淑宜家嚴慈啟後金鈎鵲印魚軒紫綬令
問無已流光不朽刻此貞珉高深共久

大宋故尚書戶部郎中王君墓誌銘

公諱克貞字守節其先太原人也緱山之胄本固源深
淮水既微枝分派別所居占籍吳楚為多今為廬陵人
矣曾祖某不仕祖某贈吉州別駕考某屯田郎中君弱
不好弄幼善屬文風骨峻整器度閒雅年未及冠名聞
於時自唐室之季詞場道喪江左延祚復覩舊章翰林
學士江君文蔚典司春官詳求藝實取人至寡較文尤
精君一舉擢第首冠諸子時人以為追蹤元和之際矣
明年以秘書省正字釋褐入直樞近專掌文翰之任措

詞典雅叙事詳審守位以慎當官以勤由是二十餘年
累遷至中書舍人樞密副使未嘗他任求之前載亦為
異矣及末葉多故時政浸衰唯君守道中立不涉浮議
及宗國淪喪策名天朝自太子中允歷戶部兵部二員
外郎禮部戶部二郎中典漢滑襄梓四州事皆以寬簡
為務仁愛推誠當時之不名臣僕長孺之擇任丞史是
故民以之睦政以之修端拱二年秋自梓潼還至京九
月十八日遘疾終於興州之傳舍享年六十明年某

月日葬於揚州某縣鄉里禮也夫人隴西縣君李氏早
亡無子女一人許適鹽鐵使諫議陳某惟君有文雅之
用有周慎之誠言行相顧光塵不異奉職無廢舉在私
無情容歷夷險而不回保始終而無吝初君始從鄉薦
余已典綸誥謬為先達屢辱請益及余消長任運而君
金石不渝古人之風於是在矣已悲深谷更閱逝川發
為哀詞識彼泉戶銘曰猗嗟夫君心冥氣純英英達士
亹亹詞臣不愆於位有惠於民無悔無咎不溜不磷吉

往凶歸道悠運促旋自九折復於左轂駟馬悲鳴市人
行哭邈矣彼蒼云何不淑悠悠邗水隱隱崑岡慈親臨
奠令季持喪旁羅宰樹下閔玄堂郊原掩靄雲日冥茫
痛光塵兮永已念蘭菊兮徒芳

大宋故尚書兵部員外郎江君墓誌銘

君諱直木字子建尋陽人也廬九之地時生俊才忠壯
之族世著南國末葉堙替與時汙隆儒墨退讓垂為家
法曾祖晁祖蟪考騭皆不仕伯父覺與先君同隱廬山

以經學大義自娛伯父後膺宰府之辟自求絃歌之任
報政罷去復隱舊山孝友貞清鄉里推服先妣李氏方
娠夢神人授以直木一本寤而生君故取名焉幼而穎
悟生知經義七歲以神童擢第未幾丁先公憂至性孺
慕宗族稱歎孜孜色養無復宦情學古屬文惟日不足
爰及弱冠遂以詞藝知名其為文清淡簡約自為品格
尤長於古風詩家居凡二十五年親友敦諭乃從常調
釋褐太常寺奉禮郎轉江都縣主簿直以事上不失其

恭勤以率下畢舉其職民從其化吏服其能府尹陳玄藻縣令路儀皆恃才傲物獨推重於君以為不如也改江夏令其理如初鄂州何洙武勲致位性復暴桀亦加優禮異於餘人嘗視君舉止迂緩車服朴野輒怡然而笑每誚諸寮屬曰君輩稱為儒生不學江令也秩滿改蘄州黃梅令議者以為屈君以鄉曲俯接欣然而往踰歲遷歙州黟縣令會宗屬封建妙選府寮授君記室之任處平臺複道之地列璫簪珠履之間清節素風凜然

不改正詞直道動必盡規府君甚重之十有餘年累遷至水部員外郎賜緋而記室如故庚午歲府君奉使天朝留鎮充海授君泰寧節度判官檢校金部員外郎數年遷司門員外郎判刑部今上元年加朝奉郎先君贈大理司直先妣追封隴西縣太君視事三載求外任以自效上以君恭勤詳慎宜久其職拜兵部員外郎仍兼刑部享年六十有四居常康寧微病數日奄從物故時太平興國五年冬十二月二十八日也即明年二月十

日葬於開封縣汴陽鄉豐臺里禮也前夫人封氏今夫人太原縣君王氏皆有窈窕之質幽閒之操叶此貞節尉其門風長子敞京兆府醴泉縣主簿次曰用成用明用澄用康用平用文用寧女二人曰慕昭用貞君生於季俗世全素業性純貌古行潔文高守道安貧非禮不動未嘗忤物亦不隨流真所謂鞠躬君子者矣夙惠之性稟於天資年十餘歲侍伯父食不過園蔬而已伯父戲之曰啜碧薤之羹淡而無味君應聲對曰齧紫茄之蒂鏗

爾有聲人知其當大成也余始聞其名晚乃識面察言
觀行重其為人藩房見選余所薦也亦既稱職頗嘗自
多丙寅歲與君俱年五十歲日會飲酒相與賦詩君先
就曰學易寧無過知非素有心余遂不復作也君有文
集二十卷嗚呼契濶夷險咨嗟年鬢一生一死孰克忘
情聊存挂劍之期故有刊銘之作其詞曰嗚呼江君世濟
其名生今之俗為古之人閨門侃侃鄉里恂恂其實如
秋其華如春握蘭有裕伏閣惟勤考終歸全邈焉清塵

葬於所沒古稱達者浚水長源夷門迥野徒挂寶劍空
馳白馬勝氣如存逝川不捨勒石垂芳千載之下

大宋故陳留縣主簿贈太子中允李府君墓誌

銘并序

府君諱某字廣途其先隴西狄道人仙源帝系蕃衍萬
邦隴西一族獨為鼎甲中葉從官因家雍丘今為縣人
曾祖巢祖禮皆不仕考洪蔡州長史府君清明稟氣才
智夙成幼而屬文已洽時譽既志學通左氏春秋未冠

即為講說橫經請益虛往實歸微言奧義別為編錄年
二十三舉進士再不中第後唐天成初宗人璩為大宗
正見而器之曰王室多故吾道未光得祿而已何必是
也乃表為屬吏委以牋奏丞相鄭公珏奇君之能特除
蔡州汝陽主簿奏課連最改冀州南宮主簿於時朝運
告謝河朔多虞君內撫疲羸外給軍旅民安事集郡國
稱之澤潞節度侍中馬公存節聞其名辟為管記薦章
連上制命弗臨君知命之不遭乃謝病而退閉門却掃

以名教自娛漢氏初基羣心改屬親友敦喻復詣京師
直道而行焉往無吝又為興平河東二主簿秩滿以常
調當遷望令時皇運肇啟多士徇名君之次子巨源已
從鄉薦獲知於尚書陶公公時典選事謂曰丈人才高
運否遭迴下位區區一宰未足為光孰若復佐近畿以
便吾子之奉事不亦可乎乃除陳留主簿乾德六年春
三月四日終於縣署享年六十有八夫人追封瑯琊郡
太君王氏緱山仙派河洲懿德婦道以順家人用嚴睦

族惟和訓子由義以乾德三年月日先逝俱權殯於縣之乾明寺至雍熙五年二月日合葬於開封府開封縣吹臺鄉蘓村禮也子五人長巨舟早亡次巨源擢進士第今為都官郎中鹽鐵副使次巨載以疾家居次巨川巨卿及二女皆早夭惟君懷恬淡之性秉貞介之規孝以奉親仁以睦族雅志宗道餘力攻文有孔墨之志無管樂之遇淹翔末路從容自若所至之處輒構茅齋延高士談宴終日曾無倦容嘗謂諸子曰吾志在大名非

欲夸世欲行吾道爾時命不偶古則皆然汝輩宜勉成
吾志也而巨源果能奮竒藻捷高科際會聖明騫翔臺
閣長才利及應用忘疲追遠之澤漏於泉卜宅之儀由
乎禮積善之家斯在大名之應何慙仁人孝子正當如
是鉉嚮風斯久傾蓋甚歡不朽之文惠然見託賢賢善
善翰墨之任也故采家牒勒於貞珉其詞曰才高位下
古實有焉積善餘慶神寧捨旃邈哉李君一時之賢其
身則屈其道斯全餘慶伊何實有令子奉之以孝葬之

以禮蜃輅同載佳城雙啟九原與歸三廟而祀遺愛被
俗沒而不忘貞珉頌美久而彌芳阡如京兆地即桐鄉
綿綿瓜瓞永永流光

騎省集卷二十九

欽定四庫全書薈要卷一萬四千二百二十五

集部

騎省集卷三十

宋 徐鉉 撰

誌銘七首

故唐慧悟大禪師墓誌銘

并序

士有佩服聖道闡揚師訓進不累於軒冕退不滯於丘樊惟勤身於濟衆不養高以絕俗其真仁人矣大禪師名冲煦字大明姓和氏昔者帝堯光宅天下我祖世掌天官保姓受氏冠冕百代在漢則調鼎之重在晉則專

車之賢末葉堙沈徙居固始先君從郡豪王氏南據閩方今為晉安人也大禪師生稟異秀幼挺玄機年十有五詣鼓山興聖國師出家即具戒品博覽經史雅好文詞郡多俊秀咸見推仰証無為之理演不信之教綽為先達端然妙門居城北之昇山於時王氏哀淪亂臣專恣淫刑飛語虐及善人大禪師杖策去之適臨川郡中書令宋公齊丘作鎮南楚頗尚空玄聞師之來遠加延納言意不合拂衣而行下至池陽郡守王公繼勲鄉國

之舊賓禮甚渥時季唐二葉像教方興嗣君聞其名召
與之語移晷而罷眷矚殊優命居光睦禪院復遷長慶
道場俾與諸貳游處實羽翼也後主即位恩旨加隆特
賜法智禪師之號廬山開先禪院者嗣君所創真容在
焉命大禪師居之精嚴修奉之儀以申罔極之感君數
數召還建康止報恩禪院加號慧悟大禪師名其所處
曰智度堂精廬櫛比選勝而處禮秩之數有踰於前出
則居奉先道場入則居淨德內寺開寶七載夏六月寢

疾旬餘乃與大衆論生死之理十九日清旦上疏告辭
後主遣使問之至則化矣享年五十有九住法四十四
年即其月二十五日從西域之禮收靈骨葬於鍾山之
陽禮物官給中使監護至某年月日弟子省才遷於廬
山某所遵理命也大禪師風骨秀整機神穎悟博該衆
藝綜以玄談王公大人咸所欽尚鉉非學釋氏者不能
言其道業徒以傾蓋之分久要不忘今來京師復與才公
胥會才公以文藝精敏見重於時永惟嚴師之義願刊

不朽之迹嘉其偉志為作斯銘銘曰慧悟禪師釋雄之
奇有文飾已有道應時生延世寵沒有遺思歸舟翩翩
九江之湄鑪峰勝境蓮社餘基門人稟訓遷神於茲哀
翁懷舊勒銘誌之蘭菊無絕高深與期

故唐衛尉卿保定郡公徐公墓誌銘

公諱迪字昭用東海人也仁義之胄繁衍萬邦別族於
太史者十家因封而占籍者四郡而有郊之邑鉅人實
多著於簡編可以揚擢唐室云季天下崩離江淮之間

獨為漢守惟我大父首從義兵受遺戡難同伊尹之相
太甲宇孤立後如有虞之保少康故得勲銘鼎鍾世享
茅土連姻合族與國存亡考諱知詢為江西節度使公
生於郡廨方孩而孤四歲免喪即加五品之服幼學就
傳遂䟽百里之封立朝侍祠恩禮優渥自太子中允累
遷至衛尉卿天資嚴肅常持謙下之禮世祿隆盛每存
恭儉之規不讀非聖之書自為保家之主思不出位
時無間言始終一心出入三紀嗚呼星迴日薄棟折榱

崩命有所懸義無苟免享年四十有六開寶八年冬十月二十有八日沒於難明年春三月權窆於大塋之側至某年月始備大塋之禮卜祔焉夫人王氏張氏劉氏皆早世並南朝之名族享小君之命數壺儀婦順彤史存焉子太素太初太冲等皆修令名不墜前訓故能以淪胥之後具飾終之禮奉先之孝時以為難宗人永懷是有紀述辭曰於惟我宗昭時顯庸積德垂範爰生我公入孝出悌夷心直躬生能業官沒不忘忠是有慶靈

鍾於令子不墜其訓塋之以禮謀卜謀筮維桑維梓神道永謚流光不已來者難誣斯之用紀

故唐朝散大夫尚書水部郎中崔君墓誌銘

公諱致堯字用之其先清河人也周室大風肇洪源於公望漢庭明月抗忠節於季珪德厚流光謀孫翼子冠蓋之盛莫之與京我高祖翼高有唐四至丞相曾祖彞不仕祖潯吏部員外郎考億建州建陽令值天下亂因而家焉今為建安人也君少而不羈長而好學介然如

石非禮不行鄉曲之名藉甚於世季唐嗣業博采時才
君以卿族之秀獻書求試補江州彭澤縣滁州清流二
主簿改建州浦城軍判官所至有聲應用不暇再為建
州將樂令其地巖險其民愾悍寇攘亡匿率以為常君
厲以嚴明信其刑賞汙俗咸革比户安居遂獲貞幹之
稱又遷紀綱之任改常州錄事叅軍連考善最擢拜殿
中丞遷虞部員外郎郡國之政多使案治忘身徇節綽
有能名無何都下受兵羣帥入援以君為水部郎中實

掌軍饋既而時運告謝宗社淪胥諸侯之師莫不卷甲
君與其部將南趨建安中塗衆潰遂沒於難春秋若干
嗚呼興亡之數聖賢安能免忠義之節顛沛必於是不
然何以見伯夷首陽之風王蠋布衣之操也夫人吳氏
克有婦德能緝素風貌是流離不墜門閥子憲實定等
皆稟庭訓咸修詞業憲在舊國以進士擢第入朝為潁
州沈丘尉復從州里之舉皇上臨軒親試又擢高科為
隨州觀察推官所謂善人必有餘慶某年月日憲等始

備大塋之禮號奉靈柩寔於某州縣鄉里之原禮也鉉
素熟君行學因銘墓焉銘曰嗚呼崔君百世清芬狗國
忘身斯為貞臣種德垂訓斯為慶門芄芃故園戕戕高
墳沒而不朽用勒斯文

故汝南縣太君周氏夫人墓誌銘

夫人諱某字某廬江舒人三國時吳將公瑾之後公瑾
塋於舒之宿松今裔孫奉祀者百餘家雖降在猷畝而
時生聞傑烈考諱本幼而遇亂自奮從軍吳王創基功

冠諸將季唐建業位列宗臣官至中書令封西平王夫
人即西平之弟某官名某女也天姿玉瑩淑性川渟孝
德內融柔儀外映既笄歸於徐氏府君諱某即唐相司
徒公玠之弟某子也於時江左方盛二族齊榮婚姻之
貴雄視王謝而夫人雅惟謙謹率由禮經至於蘋藻之
嚴佩環之節澣濯之儉纖紵之勤必以身先罔弗由道
宗族親睦人無間言府君仕為閤門副使殿中少監早
卒四子皆幼夫人提攜教誨親授經書及其出就外傳

已通孝經論語矣性曉音律而尚雅聲善絲竹而精琴瑟習孝經而宗立言齋居諷誦未嘗懈怠雖閨門之內常以慈撫而家人之節有若嚴君故其門風肅然先業不隕豈非天和充已而道氣感物者歟春秋四十八開寶九年正月二十一日終於建安瑞里官舍其年二月塋於江寧縣鳳臺鄉婁侯里長子某亦為諸司副使及入朝為京兆府醴泉令陝州錄事叅軍公府交薦遂升閨籍太子右贊善大夫夫人始以子貴授汝南縣太君

至是朝命復追榮焉次子繼宏舉進士次繼宇次繼宗初夫人之亡會宗國淪覆寔宐之事不暇如儀至太平興國某年月日繼宗等始改寔於某所祔大塋焉禮也鉉與西平諸子辱為交游及相府宗黨復敦事舊故得以門內之理為隧道之銘傳於無窮斯為實錄銘曰侯藩之子相門之嬪道高萊婦德劭陶親猗歟彤管永世芳塵生榮歿哀何必眉壽粉田啟邑斯為不朽令子承家斯為有後孤郤降替二族依然谷陵遷貿松楸

祔焉謂天蓋高福善胡愆勒銘泉石蘭菊綿綿

大宋故亳州蒙城縣令賜緋魚袋曾君墓誌銘
君諱文照字知章其先魯人百行之先垂為家法子孫
蕃衍不墜其聲末葉因官徙居南楚今為廬陵新淦人
也祖朴考福皆不仕君生稟異氣卓然老成六經蘊旨
有若夙習於時江表之地唐室猶興憲章文物不失舊
典君年七歲應州里之舉以神童擢第選滿補江州東
流尉遷靖安句容二尉皆以清白敏惠承上率下和而

有正能不自矜連考殊尤擢為吉州太和令桑梓之地
瓜李多嫌君閨門之行素修童艾之情已信而復臨事
能斷盡公無私由是朞年政成就賜朱紱會宗國淪覆
舉族入朝授亳州永城令舟車輻輳之地郵傳旁午之
塗盤根錯節發硎靡滯事無愆素民不告勞上䟽論以
一邑之衆供列郡之賦指引利害較然可分詔特許免
其縣挽船夫歲省萬計改蒙城令其理益精頃之河南
大蝗獨不入蒙城境於是吏民相率詣闕借留優詔褒

美許留三載會王師北討君督本縣運輸深入北庭危
而復濟既還遇疾以雍熙三年四月日終于永城傳舍
享年若干初君之赴選也余遇之於建康察言觀行知
為良士因以表甥女姜氏妻之有子六人女八人君之
從仕世途多故王事靡盬不遑顧私雅志未申中路早
世唯第三子乾度再舉進士名聞場中有後之慶當在
於此即以某年月號奉靈柩歸葬於某鄉里祔大塋焉
禮也嗚呼姻舊之故豈無他人援毫濡涕識彼陵谷其

銘曰有惠於民死事以勤嗚呼曾君永世清芬仙山之
陰章江之濱考終歸全下從先人刻茲琬琰垂示後昆
故唐內客省使知忠義軍檢校太傅尚公羨道

銘

公諱全恭字子初其先清河人也粵若天監代商文王
受命渭濱卜獵尚父膺期實始華宗誕彰餘慶在漢則
丘園之盛德在唐則藩屏之名臣蕃衍孫謀著之家牒
祖憇潤州館驛巡官因家焉考公廼為昇州牙將為郡

守馮鐸使於淮甸與吳武王議疆事抗詞奮厲誓不辱

命明年而馮氏兵敗悉衆歸於廣陵吳王得之甚喜曰

汝為馮公詬我真義士也今事我無易爾心即以右職

處之賜與甚厚由是感激知己竟死事於鄱陽以故三

子皆獲叙錄累贈右千牛將軍公即第三子質性端慤

容貌矜嚴吉人寡詞非禮不動季唐有國公仕為客省

承旨先主器之特加任使凡所授職皆與先達長者侔

勤以繼之所至皆理累遷至館驛副使嗣君即位轉閤

門副使遷客省引進使凡時務制獄多命公與焉循理持平甚獲時譽宣布詔命出納必信監護師旅威惠得中不從諛以取容不矯激以忤旨故考績無玷而主恩益深累遷內客省使後主即位兼領閤門使遙領婺州刺史初國之戈船皆屯於石頭城之後廬龍鎮上命曰龍安軍旅之重任也於是復兼龍安軍使明年改潤州監軍使權領州事善於為政大洽民謠逾歲徵還遙領饒州觀察使兼左龍衛神武護軍公固辭兵柄閩嶺之

地巖險遼遠鎮守之寄常以為難又命公知忠義軍兼
建州事蒞政三載建人安之會都下受兵羽檄相望公
調發軍實應接舟師奔命之衆道路相望猶以不獲身
先憂憤成疾朝廷方命公為節度觀察等使留後檢校
太尉使者未至甲戌歲冬十一月二十五日卒於公署
享年七十以十二月二十三日塋於建安縣某鄉某里
前夫人蘓氏繼室安樂縣君孫氏皆早卒子三人審元
審庸審能公以忠烈之風處親近之職守以周固齊以

法度身貴而志遜祿厚而持廉凡同列者使於諸侯率
多貪求浸以成俗公獨淡然無取出入垂橐士君子以
此重之及邦國淪胥豪右降替向聚斂者翦焉無餘唯
公令嗣克家門族如故識者知有天道焉鉉少叅近密
與公常接言笑道義相期有若寮舊聲塵永已慷慨長
悲惜其風猷思有論撰昔裴子野之卒湘東王為誌矣而
邵陵王又銘於羨道羨道有銘自此始也故仰前躅追而
銘云表海之慶世載厥聲展矣君子心純道貞恭職軒

階申威禁營將命四方宣風百城哀哉不淑永矣忠誠
舊國永黍交情死生濡毫頌美愴愴沾纓

故鄉貢進士劉君墓誌銘

君諱鶚字仲翔其先彭城人也炎靈之裔繁衍萬邦占
籍廬陵蓋重世矣高祖下皆不仕父雄嘗從九江辟司
兵掾自免去職閨門之教不肅而成有三子君其仲也
質性純素智識聰敏年十有五則知屬文未及弱冠馳
名矣至於事親孝事長悌與朋友信接鄉黨讓動不違

禮居常慎獨故州里耆耄與時之名輩推重焉郡舉茂才擢升上第明年而宗國淪覆君慨然知時之不利也於是閉門却掃為學益勤以為今之文人率以辭賦取高第先王之教化益蔑如也乃撫天下之務論古今之變著法語八十一篇大抵宗尚周孔以質百氏之惑視其書知其人矣皇宋二聖崇古尚文郡國孝秀親臨考覆君以詞場舊望復為本郡升聞余與翰林學士賈公承詔先考第於南宮賈公重君之文以為古人之俊也乃第

為高等而君徇難進易退之質稟內敏外愚之容及其
敷庭復不中選退還鄉里篤行如初雍熙三年九月卒
於家享年四十有三嗚呼有才有時命不我與自古同
歎可勝道哉遺文累裒不朽之謂也即某年月塋於本
縣化龍鄉折桂里之原禮也君娶郭氏先十日而亡子
師望文綺皆得父風其有後矣二女長適太原郭方次
適隴西李某師望以余為父之知己也故千里號訴求
誌其墓云詞曰嗚呼劉生江楚之英才識兼茂時命難

并沒於白屋閔此泉局立言可法何必浮榮刻茲貞石
永爾高名

騎省集卷三十

墓誌銘

上即位之元年冬以學士李昉獨直翰林詔太子率更令徐鉉入院分直視草是時昉與公以同道相知論交契之始也越四年春天子率六師親征太原并壘既平遂北幸塞垣耀兵廬龍秋七月凱歌歸於京師軍衛之中書詔填委公援筆馬上應答如流以扈蹕勞遷給事中直學士院如故又四年授右散騎常侍始罷文翰之職端拱元年帝親耕籍田改左散騎常侍積階至金紫

光祿大夫叙勲至上柱國累封至東海郡開國侯食邑
一千戶以淳化二年秋九月檢校工部尚書出為靜難
軍節度行軍司馬明年八月二十六日晨時起方冠帶
遽命筆硯語左右曰吾疾作矣手疏一幅約束後事又
別著一幅道者天地之母書訖而終年七十六陝西道
轉運副使鄭適來邠州遂出家財竭力襄事即以其年
十月奉遷靈柩還京師權厝於板橋東南之佛舍愛婿
國子博士吳淑門生殿中丞杜鎬時皆典治中秘書遂

以公去訃聞上覽表軫詔出內府錢二十萬賜其家人
明年七月洪州奉新縣義門胡仲堯自豫章具舟楫迎
公之喪葬於洪州新建縣西上之鸞岡原奉遺令從先
塋也公字鼎臣其先會稽人自言生於揚州曾祖諱源
祖諱徽皆隱德不仕父諱延休衛尉卿贈左僕射才高
道直有名於時公幼孤與弟錯俱苦節自立未弱冠以
文行稱於時仕江南李氏周旋三世歷校書郎直宣徽
北院尋直門下省三知制誥一遷司封郎中兩拜中書

舍人再入翰林為學士自貶官起為太子右諭德由尚書左丞為兵部右侍郎為御史大夫由大夫為吏部尚書由尚書為右僕射同叅左右內史事堅讓不就王師下金陵隨後主歸朝以太子率更令奉朝請今諫議大夫張公似說在江南時奉太夫人慈訓不妄遊下帷著書雖親族罕見其面年十六遇李氏先主霸有南土辟命累至釋褐連任書府由是經史百家爛然於胸中矣其典誥命也落筆灑翰應用無窮皆混然而成有雅正

之體當時名士如韓熙載者無敵尤長於制誥公與之
齊名其豫機密也居中守正無所附會雖在家莫居如
對君父其恭慎也如此當時用事臣有陳覺魏岑者樂
禍好權多撓時政公嫉之如讎其掌貢舉也至公取人
不受私謁先策問而後詞賦進德行而黜浮華當時舉
場號為得士公弟內史舍人鍇每主文柄亦以直道自
持故江表後進力學未至者聞二徐為春官多望風引
退其精鑒無私也如此其持憲也當官執法無所屈撓

奸邪為之側目權貴因之斂手當時言風憲者惟公與
故御史中丞江文蔚王師之渡江也公將本君之命使
於朝廷且乞緩師以奉祭祀太祖引見謂公曰汝主托
疾不朝乖事天之禮況吾兵業已行無中輟之理歸報
汝主善為之謀公因慷慨鋪陳自古成敗之道表明後
主忠孝之節太祖亦為之動容厚禮之遣歸初大軍已
圍建業後主思命於交兵之間左右咸有難色公欣然
請行後主謂之曰爾既往即當止上江救兵勿令東下

公曰是行非全策今城中所恃者救兵奈何以臣此行止之後主曰此以和解為請復用決戰即是自相矛盾於爾行得不危乎公曰今豈以一介之微而忘社稷之重但置臣於度外耳後主撫之泣下曰時危見節汝有之矣及歸朝太祖盛怒責之曰吾向與汝言何為弗達於汝主且拒抗之罪皆汝所為公頓首謝曰臣為江南大臣而其國滅亡祇此死有餘罪餘復何言太祖於是歎息曰忠於所事者乎汝當事我如事李氏命坐存撫

甚厚故相太子太師王公溥一見如舊相識每有經史異義多質疑於公由是琴樽嘯歌筆硯酬唱無有虛日相得甚歡故工部尚書李公穆有清識嘗語人曰吾觀江表冠蓋若中立有道之士惟徐公近之耳兵部侍郎王公祐負才尚氣未嘗輕許人及見公嘗言於朝曰文質彬彬學問無窮惟徐公耳公亦曰王公詞如江海心無城府真奇士也今吏部侍郎李公至翰林學士承旨蘇公易簡皆當世英俊奉公以師友之禮公仕朝廷將

二十年前後錫賜所得俸祿所入備伏臘外未嘗蓄聚
一金所居之地僅庇風雨惟古木數株每夏秋之際霖
潦為患頽垣壞宇人不堪其憂而公處之晏如也江南
故人子弟暨親戚之孤遺者來投於公歲無虛月公分
廩祿以卹之虛館舍以安之殆於終年未有倦色有布
衣蒯亮者老而多誕遊公之門僅五十稔年九十猶矍
鑠不衰每從江南來諸公公置之道院日與之碁未嘗
語及他事而待之如初公嘗言江南有處士朱貞白嘗

語人曰今人或言不欺神明也吾嘗佩服斯言不敢為欺心之事有故人謝岳嘗為號州盧氏令刺史與之有隙凡選舉之制過七十即罷去遂奏謝年過不堪其任時江東初下仕人有可疑者咸質於公謝因私請曰某之齒公實知之苟朝廷問公不敢望公言未七十但言不知其年即幸矣公曰君之甲子某具知之而云不知是欺天也苟或見問必以實對其至行無難又如此公為文智思敏速或求其文不樂豫作令其臨事見白立

為草之云速則意壯敏緩則體勢疎慢公愛婿吳淑言
江南宰相馮延巳常語人曰凡人為文皆事奇語不爾
則不足觀惟徐公不然率意而成自造精極時人以為
知言所著文多遺落今其存者編成三十卷又擬徐幹
中論作質論數十篇集耳目聞見之異作稽神錄二十
卷并行於世公文學之外長於篆隸書札之妙自成
一家當世士大夫有得其書者無不寶之以為楷法任
常侍日奉詔與直史館句中正等重修許慎說文自撰

韻譜一十卷學者服其精博公嘗慕老子清淨之教莊
周齊物之理故內不能以得喪動外不能以榮辱干然
而為學之心老而彌篤在邠州日以時俗文字譌謬乃
親以隸字寫說文字體纖細正如蠅頭過數萬言年高
目明洞見毫末其精力不怠如此夫人太原王氏子朗
州桃源令夷直並先公而卒長女適吳氏早亡次女適
左贊善大夫高慎交幼女十七娘才淑過人未及笄年
而天自為誌文辭甚悽楚意孔門四科德行文學洪範

五福壽考康寧在於古人鮮有兼美惟公高才懿行善
始令終所謂登孔門之二科居洪範之三福也語曰善
人吾不得而見之矣惜哉銘曰祖丘軻兮宗老莊奉三
寶兮師五常生維揚兮仕建康歸皇宗兮老大梁歿邠
土兮葬豫章儒林文人兮今也則亡嗚呼李昉撰

謹案卷二十八第四頁前一行汗漫與期原本期
訛斯今改

第七頁前四行今塵騎省原本塵訛慶今改

第九頁後二行道俗敦請原本敦請訛廓清今改

第十三頁前二行旁績靈變原本旁績訛勞績今
改

第十四頁後一行高塢環其趾涇水盪其胸原本

高塢訛尚庶涇訛湮據唐書地理志改

卷二十九第一頁前四行大宋左千牛衛上將軍
按五代史左作右此同南唐書

第六頁後二行浚川東注原本注訛流據廣韻改
第十二頁前一行畢舉其職原本畢舉訛異學今
改

第十二頁後三行授君泰寧節度判官原本泰訛
奉據五代史職方考改


第十四頁後四行丞相鄭公珏原本珏訛班據五

代史改

卷三十第七頁後八行狐卻降替原本狐訛孤據

左傳改





總校官庶吉士臣張能照

校對官學正臣李巖

謄錄監生臣李如梓